

四庫全書

集部

欽定四庫全書

集部

誠意伯文集卷十五

六

詳校官中書臣呂光復

中書臣劉源溥覆勘

總校官編修臣王燕緒

校對官編修臣秦泉

謄錄監生臣秦鴻甲

欽定四庫全書

誠意伯文集卷十五

犁眉公集上

文

少微山眉巖神仙宅記

神仙果有宅乎超無為以至清與太初而為隣又烏有
所謂宅也神仙果無宅乎左帶瑤池右環翠水繚以赤城

明
劉基
撰

玉樓十二其傳非一惜乎吾不得而見之也世之人由不能見遂并神仙以為無有嗚呼是非知造化之情狀者也夫造化之神妙豈夫人之所能窮哉天地生物各稟氣以成形人亦物之一也物能化人奚為不能化故雀化為蛤鼠化為鴛麥化為蛾螫化為蟬蠟化為蝶魚與蛇化為龍吳之桑晉之石楚之枯木冥頑無靈去人甚遠乃或化而為人或忽然而人言焉由是觀之天下之物無不能變化也審矣何獨於最靈之人而疑之哉

縉雲之山桐溪出焉東南流入於好溪其南曰少微之
山是為括蒼洞天有觀曰紫虛紫虛之山水清奇幽邃
甌括之間無與為比自唐宋以來神仙鍾離先生呂洞
賓皆嘗來遊而章思廉徐泰定即其觀之道士也皆以
羽化去其事蹟顯著人能言之不可蓋也履其地思其
人寧不飄然有凌雲之志哉觀之南有山曰眉巖章先
生羽化之後葬其冠舄之所也今道士梁惟適及其弟
子王有大每至其所必裴回興感嗟先生之緒不續故

於巖傍作室以邀先生歲時致享祀而以神仙宅名之
夫先生神遊八表雷霆為輿風雨為駕躡光景超滅沒
亦安事夫宅哉其或鑒二子之誠心而為之一來不可
知也故為述其事而繼以歌惟適字安宅基祖母永嘉
郡夫人之姪孫基之外姪也有大字處謙皆括蒼人歌
曰

幽華兮春菲明月兮秋輝仙人去兮何時歸空山寂寥
兮使我心悲檀為梁兮楠為柱白石承楹兮青蘿為宇

攀桂枝兮延佇高玄無梯兮淚零如雨瑤壁兮丹崖鶴
晨鳴兮猿夜哀愴怵恨兮倚長懷望夫君兮來不來挹
寒泉兮薦芳芷長烟徘徊兮清風四起洞谷谿衍兮笙
竽盈耳松篁戛摩兮毛髮颯灑采瓊英兮琅玕將以遺
兮飛鸞盼盼嚮兮杳冥聆環佩兮雲端逍遙兮夷猶傷
心兮離憂拜稽首兮陳情冀神君兮長留

送宋仲珩還金華序

易不云乎有子者無咎庚子之歲予與金華宋先生俱

來京師時上渡江未久浙東方歸附先生與予及予同鄉葉景淵章三益同居孔子廟學惟日相與談笑雖俱不念家而予三人者亦皆不能無芥于心惟先生泰然耳日與文彥士相從游不倦人咸異焉時先生有子二人長曰璣字仲圭次曰璵字仲珩皆克家蓋夙以家事付二子久矣故先生得以優游授道于浦江鄭氏之義門至今又十有五年矣去年秋七月予自家重赴京先生時為翰林侍講學士執手相盼睽喜溢眉目先生長

予一歲予須髮已白過大半齒落什三四左手頑不掉
耳聾足蹠蹕不能趨而先生鬚須黝黑唇齒朱貝顏渥
丹步履坦坦不落朝班後晨起戴星入國史館握筆寫
細字如青蠅頭日數千且僕僕走承召命暮歸作詩文
四五少不下二三先生素儒家無羸僮僕在京寓舊城
去公館彌十有五里惟次子璲偕一騶者從夫人又病
在寓璲來往省視父母且奉母粥藥不遑朝夕今年春
長子璲遣二孫自金華來夫人病亦愈於是先生以事

命璩暫還故里而在朝羣公大夫士咸賦詩餞璩望其
即還則璩之能善事其父執善交其朋友者可見嗚呼
若先生可謂有子无咎者矣宜其老而愈康且樂也璩
又工楷篆隸草書賦詩屬文皆足以續承家業故於其
行序以送之且繼以詩曰

條風東來靈雨從之之子于邁何以送之 靈雨濛濛
沾彼原隰送子于郊為子佇立 有鳴者鳩在彼苞桑
習習其風載吹我裳 維桐之華亦炫于野悠悠行子

亦駐其馬 維水東流維日西馳眷言顧之靡靡其思
維日西馳載昏載朝維水東流以汐以潮 芄芃者麥維
其黃矣心之思矣維其長矣 贈子以詩酌子以酒晤
言何其伊邇匪允

清齋記

室以齋名取其潔也齋以清名清者潔之華也惟潔也
而后清生焉浮屠氏離世絕俗以潔為其道故剪須薙
髮割情斷愛所以潔其身也疏茹糲食屏斥魚肉所以

潔其口也趺坐面壁收神內觀所以潔其目也晨鍾暮鼓梵音海潮所以潔其耳也焚檀爇沈氤氲桂薰所以潔其鼻也幽澗閔默惟寂惟冥所以潔其心也五情既治百魔不生潔不汚而后天下之清歸焉天台朱伯賢為予言義中上人之居中天竺也有室曰清齋環以羣山縈以碧水其在錢塘時蓋嘗屢游而玩心者其為名也實稱故太虛澄朗烟空霧豁日月光華原野昭曠而天地為之清焉丹葩發鮮綠陰永晝涼颺撒暑銀漢掛

戶而節物為之清焉時雨新濯竹樹生色猿鳥不呼松
栢帖妥而巖壑為之清焉遙望西湖如大圓鏡翠縠垂
映波瀾錦章而是室之下白石玉皎暗泉金奏足音無
聞谷響相答至于今使人思不能忘請為文以記之予
惟乾坤睢刺以來人世之無此境久矣今聆朱先生言
意敬恍如夢寐幸而聖明應運宇宙載造太平景象于
今復見則所謂清齋者尚或得而游也年月日記

玉兔泉銘

并序

自古有以勢軋天下籍人口使和已者鮮不由細微以及大此姦人之素能也故高之馬莽之祥瑞惟其言而莫之違然後大詐行而大欲得矣秦檜之事宋高宗也以岳將軍之武之忠且排搆之殺其身以及其子反以為功而宋之君臣莫不從其指則亦何求而不得哉玉兔之泉以清美為建業城中第一豈昔顯而今堙者檜實知之耶或有善察土脈工穿井之術者密以語檜而神之以白兔耶則皆不可知也夫檜之罔民設詐豈下

於高莽哉白兔之是非無關天下之大事是故賢人君子忽之而莫與較於是乎鄙夫諂子遂探其意而夸之以為佞是蓋不足辯也金華張孟兼憫泉之芳潔為姦人所污而銘以雪其冤愛物之良心也予亦悲之為之作後玉兔泉銘銘曰

嗚呼泉乎夫何辜為檜所污世無吳隱之孰昭其誣嗚呼泉乎尼父大聖猶言其主瘠環與癰疽白兔之傳夫何傷於爾歟檜死為蛆泉潔自如我作銘詩衆惑斯祛嗚

呼泉乎終古弗渝

送黃叔暘歸金華觀省序

并詩

孟子言君子有三樂以父母俱存兄弟無故為樂之大
豈不以是為係乎天人人之所願欲而不可得者哉夫
孝子之欲顯父母心無窮也顯父母之道無過乎立身
揚名而鮮有能及其父母之目見是故君子之急於仕
者良有由也且父母之鞠子亦孰不望其能立功立事
超乎羣倫之上以光大其祖宗之門戶也哉故於其初

生也桑弧蓬矢以射四方不响响乎為老婦之慈以嬌之於膝下也天下之為父母者亦孰無是心哉而當其生存之時獲見其顯者蓋十百之中不能二三信乎其係乎天而不由乎人也為人子而知愛其父母則其中心為何如哉是故孳孳汲汲不遑自己仰馳光而興慕俯逝水而長懷當此之時將奚為而可哉金華黃生以明經舉於鄉就試浙江行省貢於春官時年二十有二是歲上閱天下貢士率多年少慮其未熟於世故例廩

之于國學使習聞朝廷律令練達治政然後授之職俾勿置以殖天下之良才於是生亦與焉其明年翰林學士宋公濂奉命纂脩實錄生以工書服勞史館又善於所事事竣受命伴讀齊府其年冬十有一月給假還金華覲省父母基與生俱浙東人故翰林羣大夫士賦詩送其行而屬其序於基夫生曷啻於父母俱存兄弟無故而已哉且又有祖母在學日進以充其身又際盛代事聖主受命侍從哲王出入禁闥此人人之所瞻望而

不敢覲者生於是乎兼之其為樂不亦大哉基既為之
序而繼以詩且有深望於生惟冀其服膺乎不愧不作
之訓以接跡於古昔聖賢而后已也嗚呼生其勉乎哉
詩曰

潛陽回地底暗泉發枯荑澤雉鳴鳴乳鷄鳴喈喈游
子畏祁寒掩關坐如齋濕薪燔無焰四壁生涼颼青鐙
翳其光月華照階苔及此送歸人豈不動我懷贈詩慰
繾綣俛仰空徘徊學古務成已入官期顯親高風吹秋

木誰能不傷神皇恩重丘山有願俾克伸北風送歸舟
江水清漪淪堂上綠衣舞堂前諼草春羽觴澄芳醴鶴
髮映丹脣服膺移忠訓布武追古人脩名著青簡山岳
同嶙峋

獨冷先生傳

客有遺棄世事不求利達者結屋于巾山之下居焉樹
以柔木有泉一泓躋高岡而景焉坐於桐梓之陰歌曰
衆皆喧我獨靜衆皆熱我獨冷朝作暮息兮我日獨永牧

人聆之歸而語其老其老曰隱者哉明日歛其廬問其姓名曰忘之久矣因目其居曰獨冷謂其人曰獨冷先生客出先生寢夢遊乎蒼芒之鄉覲玉帝于璿臺帝賜之遊于廣寒之宮飲之以玄雲之漿四顧無人淒風滿空星月垓北於是愀然而思悠然而歌歌曰風蕭蕭兮吹我衣高寥沆漻兮逝將安歸又歌曰風蕭蕭兮吹我裳吁何為乎踽踽涼涼覺而異之訪于鬼谷子卜之遇井之巽其繇曰井天飛吝其頤獲于南垂煇而焚而沃

其鮮而利貞鬼谷子曰木上有水井井上出者也飛而
上于天莫得而食也南夏方也暵之所由生也如燬
如焚可勿沃乎巽東南之方也其象為風泉以冽之風以清
之鮮可知矣利貞者秋冬之德也秋冬德之收藏者也宜乎
其蹢躅涼涼也吾聞天台之山南望赤城有逸人焉謂
之獨冷先生其子也夫或曰先生姓張氏蓋子房之系
胄先生不言人亦不知其果然否也

萊窩說

并序

某寓者宗姪彬之所以名其居室也彬字宗文少好學有識而未用其居在處州府城之東門每求予為文而恒弗得暇今年予來京師而彬亦以儒士貢為工部主事因戲作某寓說且以勉而進之云爾

犁眉公謂東門子賤曰子之居東門也井地十畝既夷既壤俯壕為溝倚城為墉藩以枳林緯以蘼塲是蓋比如束鍼鋏若攢鎗蛇蝎不能求其縫罅虺蜥不能為之穴隙也何不墾之以種樹乎又何不耕之以執耒耜乎

不然何不大為之池分北山之泉流以養鱉與魚乎何
為乎徒築陋室于其中墜糞土以為壁茨以腐茅蝨蝎
是宅藉以瓦礫羊蹄豕跡與鼯鼠為主客平明出門不
馬不車不羸不驢以造他人之廬呼朋命徒左蹠右趨
談無用之空言強相名而曰儒坐視殷賑之腴索為蓬
藿之區不亦悲乎吾聞燕秦粟穰橙鄧橘李梨萸鬱
秦杏周漆柿桃李楔琬容琰質椅桐枯栢堅頌有瑟桂
椒蔓檄吐芳醇醖木瓜榲桲諸萸葛芴叢蔓轆轤彼擘

此出或庸其材或以其實或黃如金或赤如日翹蕭遠
條可峰以蜜克勤厥營苟獲其一富擬封君受天之秩
范子所至穿池種魚史傳貨殖盛稱陶朱八口之家五
畝之宅墻下栽桑足以衣帛令子不士不農不商不工
綴籍州庠口體不充人皆子嗤子曷不憊東門子賤聽
之愀然思之杳然瞿然而作再拜而作立而言曰公有
言吾獲矣而吾亦有知焉請以復於公吾將以藝稷黍
乎則古人一夫受田百畝而給令將以五畝為宅矣則

所羨不過二十之一不能以不飢也抑將以種樹乎則
近者非四三年不成不知遠者又幾年乎不可以懸吾
釜而俟饗也抑且為池以畜魚乎則我身畸耳貸力於
人何日成乎不可以瞋吾肱而待汲也今當種菜而鬻
焉尚庶幾哉可也夫夫菜也者采也君子之所采也或
謂之蔬焉蔬也者疏也食梁肉者之所疏也君子所采
而食梁肉者疏之庶幾或者可以裕我矣乎乃往訪于
溪南之圃人得膏土沃泉之術蒐四鄙之菜類其族而

種之買牛牯一牯二鋤其萊蕪芟去與蔑拔其荻杜阜
翳穰而地之穿井於其四隅建桔槔焉猪水有池洩水
有渠或培或滋或叢或竒灌溉攸宜或耘或耔疎稠比
稀慈穰舉肥根莖實萇各隨其時羅之離離檻之菲菲
未浹旬月而東門氏之童色澤如也貌懌如也窺其園
則鬱鬱芊芊入其門則盎然春溫有酒盈尊他日犁眉
公過焉東門子賁御諸門犁眉公咲曰子亦足於斯而
已乎東門子賁再拜謝曰吾願見公而有陳焉久矣請

坐於吾廬而為公言之可乎公曰吾願也東門子賤曰
公能悉識吾菜乎公曰未也請之園而言焉曰始吾之
不營是園也漠乎其無思也今吾之既營是園也惟其
所以壯吾址而厚吾生則非一日也天地久其道而萬
物生聖人久其德而庶功成士農工商久其業而百務
貞故植韭以為之君韭者久也所以久吾生也致久必
慎其撥故植之以葵葵者揆也揆得其道則視明而聽
聰故植之以葱聰達則得筭多故植之以蒜蒜筭也筭不

失家必豐故植之以薑豐則彊矣故植之以薑薑強也
物大彊則過剛過則折君子戒焉故植之以芥芥者
戒也戒事者思必苦思苦則毒故植之以荼荼毒懼于
中而用力勤故植之以芹勤極則病故植之以蒲蒲痛
也病之劇也病劇必弱故植之以荏荏柔而弱也弱則
薇矣故植之以薇薇胥瘍也胥微則羸其行故植之以
萋萋者儻也愈病必以藥故植之以芍藥藥攻病不可
失其養故植之以鞠鞠養也得其養而後蘇故植之以

蘇蘇則起矣故植之以芑起必慎以保其後故植之以
瓠瓠者護也護不違乎道則難舒而福生焉故植之以
芷芷者祉也引祉莫大乎育德故植之以蓄蓄必有濟
故植之以薺薺者濟也濟自近而之遠自卑而底高也
故植之以崧崧者高也高極必窮故植之以芎窮慮窮
者必早計故植之以薊薊者計也吾朝而游焉觀其萃
萃菁菁可以悅吾目而暢吾情夕而游焉擷其芳而茹
其英可以肯吾腹而曼吾齡又可以究吾知而通物理

安得不悠然而永懷怡然而自喜哉夫吾廬窩也不足以延長者而長者肯臨焉不可以不志請名之曰菜窩願公為吾誌之犁眉公大悅遂旅其菜酌其酒書其言而去

大勇齋記

為張生作

勇天下之達德也而聖人有時乎弗德夫人之於道知足以知之而行弗逮者無勇也弗能擇乎中庸而冥行焉者鮮有不惑於其近似而淪於六蔽君子實深病之

故勇者仁知之卒徒也仁知帥乎中堅挺乎其不回於是選鋒勁騎聽指麾而疾馳如雷如霆不可遏也夫是之謂勇蓋仁知不能自行而駕勇以行及其成功則勇亦得參乎仁知同為達德苟不周於仁知昧乎不辨其是非茫乎不計其公私惟其情之所徇而果行焉曰吾天下之勇也知有勇而不知有其身而不知其違乎仁既違乎仁不得謂之知遂則為專諸聶政不遂則為荆軻要離獲書於春秋而名曰盜豈不害哉故德之蔽惟

勇為多故六言之中曰直曰剛皆勇之屬也故曰勇天下之達德而聖人有時乎弗德擇理而不精必害故德之害惟勇為大卞莊子之刺虎也伺其鬪而傷且死然後舉而兼取之可謂知矣虎毒人之獸也以是施之可也而概以加諸人則恐其未仁也是故夫子語成人取其勇矣而必曰文之以禮樂則卞莊子之勇亦未得為無蔽擇勇之難也如是哉廬陵張生名其室曰大勇大勇之云蓋出自孟子其一則對齊宣王之問而勸之以

周文王武王之事蓋當是時周德衰矣周命替矣天下之民困於虐政極矣齊以萬乘之國七九有之一苟有志於斯民則文武之事反掌可為勇之時義豈不大哉然非所以為衆人言也其一則引曾子謂子襄之言曰自反而不直雖褐寬博吾不憚焉自反而直雖千萬人吾往矣其意惟在論北宮黝孟施舍之勇非聖人之徒之勇而已使曾子而有此言必亦有為而非教子襄之恒訓也不然則曾子之學務在成已何切切於褐寬博

之不惴與千萬人之不畏哉曾子傳孔子之道者也孔子論行三軍曰暴虎馮河死而無悔者吾不與也必也臨事而懼好謀而成者也則必不怙恃其直而以身當千萬人也必矣且直不直在我於人乎何與雖千萬人吾往矣抑亦何所用其直哉曾子之雅言稱吾友犯而不校子思之作中庸得之於曾子也及其語勇則引孔子告子路之言曰衽金革死而不厭北方之強也而強者居之寬柔以教不報無道南方之強也而君子居

之則子路之勇孔子未之取也曾子亦未之取也然則如之何曰顏淵問仁子曰克己復禮為仁克己人人之所難而顏子躍然任之君子之大勇蓋如是曾子曰仁以為己任不亦重乎死而後已不亦遠乎又曰可以託六尺之孤可以寄百里之命臨大節而不可奪也君子人與君子人也曾子之大勇蓋如是生也好勇盡求諸孔子之訓而服膺乎顏子之事曾子之言則其為勇也庶幾乎無敵矣於是乎言

蘇平仲文集序

文以理為主而氣以攄之理不明為虛文氣不足則理
無所駕文之盛衰實關時之泰否是故先王以詩觀民
風而知其國之興廢豈苟然哉文與詩同生於人心體
製雖殊而其造意出辭規矩繩墨固無異也唐虞三代
之文誠於中而形為言不矯揉以為工不虛聲而強聒
也故理明而氣昌玩其辭想其人蓋莫非聖賢之徒知
德而聞道者也而況又經孔子之刪定乎漢興一掃衰

周之文敝而返諸樸豐沛之歌雄偉不飾移風易尚之
機實肇於此而高祖文帝制詔天下咸用簡直於是儀
泰鞅斯縣河之口至此幾杜是故賈疏董策韋傳之詩
皆妥帖不詭語不驚人而意自至由其理明而氣足以
據之也周之下享國延祚漢為最久蓋可識矣武帝英
雄之才氣蓋宇宙而司馬相如又以夸逞之文侈之以
啓其夜郎卽笮通天桂館泰山梁甫之役與秦始皇帝
無異致勤持斧之使封富民之侯下輪臺之詔然後僅

克有終文不主理之害一至於斯不亦甚哉相如既沒
人猶尚之故揚子雲用是見知成帝然而漢家樸厚之
尚已成其根未嘗拔也故趙充國將也有屯田之奏劉
更生宗室子也有封事之言往復開陳周旋辨析誠意
懇至理明辭達氣暢而舒非汲汲以鴻生碩儒爭名當
代者所能及也豈非習尚有源而得之於自然乎嗚呼
此西漢之文所以為盛國祚絕而復續如元氣之不壞
而乾坤不死也後之人論不及此而以相如子雲為稱

荀不亦悲哉東漢班孟堅之外雖無超世之文要亦不改故尚故亦不失西京舊物下逮魏晉降及于隋駁雜不一而其大槩惟日趨于綺靡而已是故非惟國祚不長而聲教所被亦不能薄四海觀國風者蓋於是乎求之哉繼漢而有九有享國延祚最久者唐也故其詩文有陳子昂而繼以李杜有韓退之而和以柳於是唐不讓漢則此數公之力也繼唐者宋而有歐蘇曾王出焉其文與詩追漢唐矣而周程張氏之徒又大闡明道理

于是高者上窺三代而漢唐若有歎焉故以宋之威武較之漢唐弗侔也而七帝相承治化不減漢唐者抑亦天運之使然與是故氣昌而國昌由文以見之也元承宋統子孫相傳僅逾百載而有劉許姚吳虞黃范揭之儔有詩有文皆可垂後者由其土宇之最廣也今我國家之興土宇之大上軼漢唐與宋而盡有元之幅員夫何高文宏辭未之多見良由混一之未遠也金華蘇平仲起國子學錄遷翰林編脩以其所為詩大示予予得

以諱觀之見其辭達而義粹識不凡而意不詭蓋明於理而昌於氣者也與之游知其勤而敏不自足其所已能且年方將而未艾也知其他日必以文名於盛代耀於前而光於後也故為之叙而舉昔人之大以期之年月日叙

雜解八篇

言之中於人也慘於兵故其為身害也甚於殺人夫言之傷人未至於殺也而志在是焉則人之防之烏得而

不嚴書曰惟口出好興戎君子之所以慎其言也畏其興戎也

非所馮而馮焉昧也非所篤而篤焉悔也昧而悔禍其至矣雖憂何及哉詩曰肅肅鵠翼集于苞棘傷之而已矣君子之所以守其身者禮與樂也禮不及則失其威其敬也侮樂不及則失其惠其敬也殘侮則人陵之殘則人疾之詩曰終南何有有紀有堂君德也

人各有所能也物各有所庸也非所任而任之事必蹶

非所施而施之功必圯是故有天下未嘗無人也有人未嘗無用也用得其當謂之得人用失其當謂之失人詩曰椅桐梓漆爰伐琴瑟古之人所以立而不頓者不失人而已矣

禁民之為不善善也非善之善者也化不善使之為善善也善之善者也非人之所及也天下無不可化之民也政不至於化不可謂之善也中庸曰夫政也者蒲盧也蒲盧也者蜾蠃是也詩曰螟蛉有子蜾蠃負之教誨

爾子式穀似之喻民之無不可化也

人不交而求者必其有所謀也有不約而至者必其有所為也故惟禮可以沮暴惟誠可以破詐易曰有不速之客三人來敬之終吉君子之所以不自失者豫定而不躁也

人之為觀美者將奚事乎哉型土以為器而髹之知不可以利吾用及其敗也祇足以委吾盛而猶有樂為之者何也蜉蝣之羽衣裳楚楚鄙之也

虎之在山也隱隱然微振其頰頷人與獸莫不駭也繫而檻之雖咆莫之畏矣易曰困亨有言不信夫既困矣雖默猶恐其及也而有言焉人雖聽之祇重其疑而已矣

衛公子壽

予讀春秋傳衛公子壽與其兄爭死之事及詩載馳河廣之篇而深有感焉夫以衛宣公與姜氏之行而生壽及宋桓許穆夫人豈習其家法然哉而制行過人如是

民之秉彝不可泯也抑又何多耶以文王太姒之聖而有管蔡霍叔昔人之所謂胎教者非矣宋有雀生鵲殷祀以亡物生非其類人以為妖也人之生不以類若是者其又何耶

夏后氏之郊

祭法曰夏后氏禘黃帝而郊鯀鯀固夏后之父也夏后之天下受於舜非受於鯀也禹不得以天下私其父夫鯀以治水績用弗成而舜殛之羽山天下咸服則鯀天

下之罪人也故舜之刑非私刑也天刑也以天刑討天下之罪人天下之至公也禹既受舜禪而升其罪人以配天是舜之殛鯀非也夫鯀之殛獲罪于天天殛之也非舜殛之也奉天討也而以鯀配天是天之殛鯀亦非也一私其父而逆于舜又逆于天天其弗享夏后氏之郊矣禹聖人也而敢為是哉祭法之言非也然則禹之於鯀也如之何曰廟以祭之而已矣

君子非有恭敬則不齊

祭統曰君子非有大事也非有恭敬也則不齊是非所以語君子也夫君子之所以為德者恭敬而已矣恭敬也者不可須臾離也故孔子之語仲弓曰出門如見大賓使民如承大祭大雅之述文王曰於緝熙敬止又曰不顯亦臨無射亦保聖人無一息之不恭且敬何待乎齊齊所以篤其恭敬猶恐其有未至而致之聖人不自滿假之心也謂之非有大故不齊猶可也謂之非有恭敬則不齊大不可也信斯言也是不齊之時不恭敬矣豈

所以語君子哉其悖也甚矣或曰然則所謂不齊則於物無防也嗜欲無止也如之何曰其疵同也猶可謂之泛論泛論非言君子猶可說也不若非有恭敬則不齊之陷而不可舉也大抵漢儒記禮之言多駁往往流于文而失于理取其長而去其短可也

古樂府

上清詞

王子晉好吹笙吹得神仙下玉京一朝羽化隨風去回

首故宮芳草生

天上月影悠悠似鏡看看又似鉤
自是嫦娥甘寂寞桂華相對度千秋

河漢水九秋清涼月滿空
聞鴈聲鴈聲不到夢先到
白露濕衣天未明

漢宮曲

小雨如烟畫掩扉
捲簾思見燕雙飛
不知春色能多少
得向昭陽柳上歸

江上曲 八首

數樹垂楊綠水邊
問郎何不繫蘭船
浦沙新漲青山遠
半夜月明無杜鵑

曾記樓船夜泊時
家家絃管鬪腰肢
于今絃管歸何處
綰束枯蒲當酒旗

昨夜月明天似水
令晨月落水如天
天長水遠人何處
蘆葦蕭蕭一抹烟

紫桂香銷五夜霜
碧雲收盡玉蟾光
琅玕不是人間樹

何處朝陽有鳳凰

月出前山青黛寒
鴈聲遙下碧雲端
草根錯認驪珠吐
自是西風白露團

賓鴈來時月滿洲
于今鴈去月如鉤
鴈來鴈去何時了
月照離人又白頭

憶見垂楊繾綣絲
陡看秋菊映疎籬
柳花竹絮隨風去
菊綻金葩欲似誰

紅蓼丹楓一色秋
楚雲吳水共悠悠
人間萬事西風過

惟有滄江日夜流

寒夜謠 二首

良夜悠悠星河滿天風吹窻櫺聲如管絃無酒可飲寒
不能眠枯腸飢鳴百慮交煎人生一世不滿百年寤寐
懷思曷維其然內省不疚有愧聖賢

令夕何夕歲聿其徂草木彫落山川縈紆瞻彼鴻鴈拂
翼天衢離離和鳴載悠載徐雖無羽翰心與之俱華月
出雲青鐙在隅歌以寫懷云何其吁

夜夜曲

冬夜恒苦長夏夜恒苦短短長相蔽虧殷勤望推挽紉
茅作繩繩易斷汲水作池池易旱故鏡塵昏難遠照故
衣絮散無新暖西風嫋嫋吹桂枝白露點苔黃葉滿

秋夜曲

木落霜露繁鳥啼夜方永起行望明月西風吹鴈影鴈
飛一何急鳥啼安所集徘徊不能寐望月空佇立佇立
河漢傾誰家砧杵聲關山渺千里何處不傷情

長歌續短歌

短歌調促情苦悲長歌引愁無絕期短聲欲盡長聲續
似是荆山人泣玉悲哉荆山泣玉人但知貴玉不貴身
縱令哭盡歌堪聽何異春花委路塵古稱悲歌可當哭
傷心如中金石鏃更不必聽蔡琰笳又不必聽漸離筑
長歌飄揚徹九天短歌嗚咽入九泉徒言歌哭兩情異
誰知歌聲尤可憐

牆頭花

墻頭花紅錦妬美人抱琴倚高樓只恐花飛逐風去
熒絳蠟送殘宵燕語鶯啼斜日暮

望行人

朝聽乾鵲鳴暮見燈花結鵲鳴燈結無定期鏡裏青雲
看成雪人生百歲難長保天上孤鸞海中老滔滔逝水
不回西灼灼秋花幾時好一朝復一朝一夕復一夕只
恐君心念妾時妾身已作山頭石

長松梢

長松梢青拂天歲暮商飈急寒苦令人憐陰崖有樸櫟
生在荊棘下霜凋荊棘葉網綴如簷瓦春風破冰凍勁
綠不曾赭禍福相倚伏豈不在所招寧為樸櫟莖莫作
長松梢

折楊柳

東風二月春如酒不見百花惟見柳柳絲綰烟留暝鴉
柳花蕩漾迷羲和美人捲簾看不足柳色萋萋妬娥綠
夜來微雨清郊圻鶯簧相應鳴塤篪欲寄柔條無信使

空將淚染回文字

詩

客路

客路秋風裏扁舟夕照時
渚鴻魚復陣江樹井陘旗
衰朽嗟誰與愚蒙荷帝慈
山中牧羊子歲暮爾相期

逢熊文彥

二首

相離已隔世相會豈忘情
識面非觀貌知心只記名
夕陽荒野闊秋水大江平
往事無勞問空令萬感生

憶昔相逢處湖山錦繡春
筦絃喧夾巷花柳隘通津
離別人非故推移物自新
愁來重回首涕淚下霑巾

寄宋景濂

四首

我思美人乃在仙華之山
山前夜半掛河漢天津兩
旗俯可攀我欲從之阻河
關初平不來白羊死瘦骨
蝕盡莓苔頑風沙蕭蕭隔
人間玄霜日夕凋玉顏有
鳥有鳥丁令威側身下上空
孤飛女媧石墜鰲脚折海
水散作雲霏霏山中有奇
樹一華一千秋美人何不
折寄我使

我歎恨長凝眸深沈洞谷山鬼集陰氣六月冰霜留嗟
哉美人誰與儔明年定約赤松子與爾羣峯頂上遊
有美一人兮美且仁自我不見兮不知幾春仰玄穹兮
睇參辰為合為離兮孰測其因青冥無階兮江海無津
風雨茫茫兮蛟龍怒瞋安得羽翼兮致我與隣

有美一人兮美且都青霞為衣兮白雲為裾被秋蘭兮
佩珣玕泰和與游兮中黃與居瞻望弗及兮芳歲其徂
山高水深兮道阻且紆安得羽翼兮致我與俱

有美一人兮在山中
蒼眉黑鬚兮玉雪其容
飲沆瀣兮食紫虹
澡石泉兮灑清風
邀初平兮從赤松
超逍遙兮樂無窮
安得羽翼兮致我與同

旅興 五十首

初秋積雨過衆綠光如濡
莎雞啼高樹蟋蟀鳴堦除
時物已改故芳年從此徂
榮名非我願守分敢求餘
登樓眺遠郊肆目望天衢
明月出雲中照我華髮疎
還歸掩關卧夢到園田居

憶年二三十，笑人不能勤。誦書歛萬言，落筆飛烟雲。有
朋自遠來，講論窮朝曛。一藝恥不知，高蹈躡前聞。寧知
有衰老，耳聾目如熏。身世且未保，況敢言功勲。

老不與懶期，身老懶自至。懶不與傲期，力憊難強事。茫
茫視天宇，忽忽心如醉。勞生諒何庸，顧為形所累。弱水
隔蓬萊，安得生兩翅。

秋風肅萬物，百蟲競號鳴。蟋蟀最可憐，切切悲其生。展
履步庭除，素月圓且明。翫之不可掇，渺焉忽西傾。回身

掩房闔愴悅煩慮盈太息以終宵展轉難為情

傲福非所希避禍敢不慎富貴實禍樞寡欲自鮮吝蔬
食可以飽肥甘乃鋒刃探珠入龍堂生死在一瞬何如
坐蓬蓽默默觀大運

紫燕來我簷營巢養其雛拾蟲撲我衣銜泥污我書雛
成復生子風雨同安居一旦捨我去瞻之起長吁

人生百歲間苦樂相牽攀念生復念死何時一開顏登高
望八荒目睠飛鳥還有願不克遂淚下空潸潸

秋氣雖可悲秋色亦可悅寥寥天宇曠皎皎縣象晰鴈
來山葉紅龍卧江潭潔彼美黃金花含英耀窮節佳人
不可期明月圓復缺空庭夕陰盡露草白如雪佇立望
四方彌使憂念結

窮巷屏人跡開門見青山青山似故鄉客子何當還
蜎蜎日夜鳴綠樹亦已殷白日駛西征浮雲不可攀安得
生羽翼奮飛出玄間

雨來羣山暗雨過羣山明山明猿鳥喜山暗猿鳥驚歲

暮陰風起白日西南傾寒蟬枝上號阜螽草間鳴人生
非草木能無感中情

赤霞變玄雲風起烟霧塞颼颼木葉響曠曠原野黑青
泥沒委巷關塞生咫尺水深蛟龍恣山濕鳥獸寂留滯
荷戈入艱難去鄉客翹首望太陽憂思萃朝夕

望舒乘罕車潛踰躍重淵二儀烟霧交九澤風雲連丘
陵冒潢潦溝澮成通川鶴鶴失其巢窮猿鳴可憐蛙黽
一何樂喧呼聒宵眠

西岑掛朝隴東嶺垂日脚
唵唵垤鶴鳴矯矯淵踰淒
風拂喬樹密雨翳林薄
煌煌籬下花粲粲黃金萼
含英不自銜守分甘寂寞
願持獻美人恐貽觀者愕

晨景無還暉霜露淒已繁
松柏坐榴翳桃李更何言
旦夕悲風起黃沙蔽平原
萬物盡凋落芳華誰獨存
我願化為鶴不願化為猿
鶴鳴聲聞天猿鳴烟雨昏
空林夜寥寂躑躅傷精魂

西風吹碩果草茅思索絢
械械卉木零唧唧寒蟲號
百

川日夜流泰山何其高沈浮自有定汲汲無乃勞

久雨得晚霽豁然如醉醒幽花銜餘紅遠峰出孤青獨
坐無與娛蜻蛚吟空庭良辰能幾何逝者忽如傾歎歌
欲自慰歌竟還傷情

微風振簷鐸瑤如環珮響登高看秋色俯見明月上木
落天地寬雲散川原廣來者不可期逝者日已往離居
豈無懷惻愴縈遠想

日暮登高臺流目盼雲間雲間有明月窈窕芙蓉顏光

輝被四表萬古一往還惜無騰化術仰之不能攀

江上秋風急天寒鴈南歸客子睠長途中心一何悲顧
瞻望四方有懷當告誰霜露日夜零百卉厭其枝衰謝
不待期榮盛安可追太息復太息愴恨涕沾衣

薄雲歛微雨返照涵空烟黃葵間紅蓼爛若濯錦鮮老
病苦無歡坐為憂所纏自恨非松喬不能還少年援琴
寫此曲曲盡心茫然

少別無慘容老別有苦心筋力已非故憂思諒難任春

風吹郊原雜英滿園林物生無巨細各以類相尋含情
曷能忘矧乃衆病侵勿言愁可量滄溟未為深

翔鷗搏扶搖九萬一奮翅驪駒康莊瞬息千里至谷
鮒穴坎窞鷦鷯集蓬蔚偃仄豈不憐飲啄亦何忌夸父
空有勇精衛良無智翼折海未枯身債杖徒棄何如抱
區區保已遺世事

倦鳥冀安巢風林無靜柯路長羽翼短日暮當如何登
高望四方但見山與河寧知天上雨去為滄海波慷慨

對長風坐感玄髮蟠弱水不可航曾城岌嵯淒涼華
表鶴太息成悲歌

病身如朽木螬蟻羣萃之生意已無多雨露空其滋晨
興步庭除足弱幾不持論年未應爾胡為遽如斯大塊
播萬形一軀非我私暫假終必還但有速與遲居易以
俟命聖言豈吾欺

上古人一心生榮死同哀末世自為心骨肉多嫌猜沈
沈十日雨漫漫百畝苔苔深車輪沒平路生蒿萊嗚呼

張仲蔚衡門何由開

疎庸厭人事疲病畏交游得閒願已愜敢有分外求
開門對鍾山山翠盈我眸日中市聲遠草綠空庭幽
登臨觀萬象玄理足可搜誰能走逐逐自使生悔尤

別離多苦懷三年當百載來者非所知往者今安在
浮雲旦夕起白日埋光彩天地亦有形豈能長不改
去去東園公紫芝猶可采

晨興梳短髮庭樹生秋風萬物有容色與故各不同
碩

實屬老成天
柔怨童蒙
英英黃金花
旒旒清露叢
歲暮等淪落
何異蒿與蓬

庭前草華發
夜涼螢火流
有懷不能寐
起望女與牛
那無一葦航
繁念空悠悠
淚如宵露零
散漫不可收

四月陽用事
羣物咸長榮
靡草雖就死
王瓜亦復生
死生誰所致
時至莫能爭
達人洞神理
守分絕外營
脩身俟天命
萬古全其名

忡忡坐虛室
曖曖日向暮
空烟歛
曾岑暝色半
高樹緬

邈起遐思逍遙散輕步嬋娟天上月的
鵲草間露物情豈異昔人事殊非故芳歲不可淹衰年況多慮諒無彭鏗術頽齡那能駐

天天芙蓉花向晚猶媚嫵娟娟明月輝粲粲當庭戶寒衾耿長夜夢寐空自語勞生邁六極老病在羈旅將思訴穹玄恨無搏風羽

大火沒西南晝短宵已長志士鬱慷慨老年怨淒涼
蕭蕭草虫鳴蕭蕭蒼隼揚物情各有定人意苦不常信步

陟崇丘流目睇康莊寧為歎段駑勿作騏驎良歎段駑
鼓車道里有限量騏驎被重甲力盡百戰場死骨賣千
金雖貴亦何償

人生如浮雲聚散無定期驚風一飄蕩各自東西之粲
粲陵苔花淒淒寒露時浮雲不可駐顧盼空齋咨

青青瀟湘竹倚倚被寒水遊子如飛蓬佳人曠千里登
高左右望但見黃塵起鳳凰翔不下梧桐化為枳傷懷
不可道憂念何時已

吾觀穹壤間萬變皆有窮何如順天道原始以知終清
晨攬衣起絺綌生秋風雖雖鳴雁來灼灼酸棗紅悵焉
念所思悲感集予衷佳期在何許瑤草成枯蓬佇立望
日月勞心極慙慙

小年不信老恠聞老人言忽忽老到眼却憶少年愆逝
川莫回流烏兔日夜奔憂思集方寸鬱氣如雲屯試為
少年道聽之亦茫然顧為少年子聆我爾汝篇爾未及
我耄我曾猶爾妍勸爾無我厭勿令人爾憐

今日復明日明日能幾何壯心蕭索盡思念恒苦多引
領望故鄉川路猶且長巢燕已北飛賓鴻亦南翔我獨
無羽翼慷慨中自傷

烏鳴朝啞啞鵲鳴暮啾啾聞鵲既不喜聞烏復何憂世
人務苟得君子絕外求滄浪迅風波無風即安流胡為
自冰炭以貽達者羞

嚴風萃羣有蠅蚊亦無多所憎雖去眼若此歲晏何中
夜攬衣裳起視星與河出雲未還山落葉早辭柯沈思

不成寐大息繼以歌

寒燈耿幽幕蟲鳴清夜闌起行望清天明月在雲端美人隔千里山河杳漫漫玄雲翳崇岡白露凋芳蘭願以綠綺琴寫作行路難憂來無和聲絃絕空長歎

秋山青如烟秋月白如水登高俯空曠咫尺見千里悠悠孤雲行嫋嫋涼風起涼風吹客衣客心隨風飛願作滄海潮朝來莫還歸

泊舟嚴子瀨遙望仙華山中有騎羊人皓齒頰玉顏餐

霞飲沆瀣坐石濯潺湲長嘯起天風落日為之還悠悠
隔雲雨杳杳不可扳

日落天氣涼逍遙步庭墀蟋蟀已在宇鴻雁來何遲少
壯輕遠游衰老傷別離念我親與友各在天一涯音容
兩契闊悲歡絕相知鍛羽懷舊林葺鱗思故池百年能
幾何逝者无還期俛仰增感歎有懷當語誰殷勤託宵
夢聊用慰所思

久旱草不生一雨青滿地新萑與舊枿好醜各自媚嗒

啗黃鶯吟習習玄鳥至閒庭人跡稀白日澹清氣平生
孟公綽庶足無妄覲但願長若斯撥置身外事

江城夜來雨雷音亦何平今晨視郊原草木皆發榮雙
雙布穀兒來我牆上鳴園蔬猶可藝無忘及時耕倦翻
得安巢感荷天地生

浮雲西北起飛雨東南去微微若輕烟靄靄如薄霧卧
疾少出門不知春已暮芳年復幾何冉冉征鳥度花落
有再開水流無回注坐念入杳冥明月在高樹

秋高潦水涸旻天亦淒清枯籜響悲音羈蟲振餘聲
曠落日暉慘慘游子情風林無定枝馳車鮮安旌自愧
匪賢達默默嗟其生

山鬼處幽篁自分不見天寧知無私照及此暗井泉倦
鳥思故林窮魚思故淵感荷實難忘庶其保終年

鍛羽畏高風疲馬厭長道玄陰促暮節何物能不老自
非松栢質敢冀出衆草登山臨流水及此晴日好春芳
藹蘭蕙秋實栗杭稻黃精肥可食石泉清可澡榮名何

足言息心以為寶

過蘇州

九首

姑蘇臺下垂楊柳曾為張王護禁城今日淡烟芳草裏
暮蟬猶作管絃聲

姑蘇臺下垂楊柳落葉蕭蕭日暮風天地山河有真主
迎來送往總成空

憶昔吳官無事時滿城楊柳舞西施如今柳盡西施死
恨殺當年陌上兒

陌上清歌最可聽誰知此是斷腸聲就中更有楊枝曲
恨殺昏雅及曉鶯

虎丘山下月朦朧閭闔門前動地風子夜一聲琴一闋
杜鵑聲在碧雲中

燈映前牕紙不鳴四隣無語犬號聲南陽已起為霖了
何用人間更得名

滿地寒風滿面塵荒烟白草舊通津宴安酖毒俱亡國
可但西施解悞人

成敗有天衆所知烏江拔劍更何疑誰言碧海剗蛟手
也學臨春井底兒

小雨如膏漬陌塵一溝寒碧曉生鱗餘年已自無多子
更向途中見早春

途中見去雁

昔與鴈同歸今來鴈北飛殷勤祝過鴈來往莫相違
漫成

春曉正堪睡嫌他牕上明無端雙楚雀又向屋頭鳴

明月圓復缺春風去不來淚隨花雨落點點在蒼苔
昨夜三更裏還鄉夢却成朦朧半驚覺連喚小兒名
日暮庭陰合斜陽復照簷不禁風絮亂寂寞掩重簾
病身勞應接長日掩雙扉燕子來何晚春歸寒未歸
炎赫迎新節綈袍洗未乾那知一夜雨更作九秋寒
萱草花空發丁香子又生浮雲無處所孤月不須明
淚為看花落愁因對酒多良辰不再得衰莫欲如何
望帝千年魄聲聲是淚流空庭無竹樹省得一春愁

老病歎

我身衰朽百病加年未六十眼已花筋牽肉顫骨髓竭
膚腠剝錯瘡與癰人皆愛我饋我藥暫止信宿還萌芽
肺肝上氣若潮湧舊劑再歡猶淋沙有眼不視非我目
有齒不齧非我牙三黃苦心徒自療五毒浣胃空矛戈
因思造物生我日脩短已定無舛差琚瓚不能使之少
盧秦馬能使之加攻犀鹽朽各有分鳧悲鶴悼何繆耶
不如閉戶謝客去有酒且飲辭諠譁

漫成

老去知心更有誰
愁將短髮對花枝
花殘更發新春葉
髮白空垂滿面絲
縱酒放歌憐往日
倚闌聽鴈立多時
若為化得搏風翮
汗漫東西信所之

感興

百年強半已無能
愁入膏肓病自增
千里江山雙白髮
五更風雨一青燈
繁弦急管誰家宅
廢圃荒窰昔代陵
不寐坐聽鷄唱盡
素光穿牖日華升

夜坐

殘缸背壁翳還明，坐擁衾裯閱五更。
雲捲星河垂永夜，霜飛鼓角靜嚴城。
飄搖莫計餘生事，老病都非舊日情。
想像故園馮夢到，愁來轉使夢難成。

有感

物換星移事已迷，重來舊處感東西。
可憐如鏡天邊月，獨照樓烏半夜啼。

焚書千古訝嬴秦，逃難茫茫走縉紳。
尚憶商人近京洛，

白頭容得採芝人

甲楯孤棲死不疑
那將宗社換西施
想應嘗膽秋風夜
恰似無忘檣李時

鴻鴈來時月滿天
客途僮僕自相憐
荒村觸眼惟茅屋
榆柳蕭疎起暮烟

黍稷高低菊有華
塵居恰似野人家
夕陽日向西牆過
只為微生換鬢華

魚鹽充牣稻粱肥
誰寤繁華是禍機
日暮無人唁亡國

寒鴉猶帶夕陽飛

漫漫陽春不見秋人生得意總忘愁
茱萸謝盡芙蓉發
清夜吹笙月滿樓

遣興二首

白日下西岑空庭生夕陰
郊原過雨色鐘梵隔牆音
有感憂思積無能老病深
露從河漢落不覺滿衣襟

月是今宵滿花從昨夜開
看花憐寂寞對月且徘徊
白髮添無數青春去不回
莫思人隔世聊樂酒盈盃

古歌

紅葵高花高以妍
清晨方開夕就薦
美人迢迢隔山水
可望不見心茫然
花開花落日復夜
惟覺新年非故年
人生百歲花一度
何不作樂令人憐

舊花欲落新花好
新人少年舊人老
佳人見此心相憐
舉觴勸我學神仙
我聞神仙亦有死
但我與子不見耳
祇言老彭壽最多
八百歲後還如何

雙燕雙飛入我堂
銜泥養雛何太忙
養得雛成却飛去

雙燕雙飛復如故東園桃李春萋萋日華烘露生紫霓
一朝實熟付人採葉枯枝折空成蹊

七月七日

百年佳會幾今宵脈脈相看一水遙漫道天孫解專巧
却教烏鵲為成橋

夜泊桐江驛

伯夷清節太公功出處非邪豈必同不是雲臺興帝業
桐江無用一絲風

節景

江城五月冷脩脩細雨微風拂面愁汀蓼不知猶是夏
競開丹粟滿枝頭

薄寒輕雨細如絲風滿長川棹去遲漠漠野田將暝色
纖纖汀草欲青時

松葉酒歌寄梁安宅

道人贈我松葉酒味似瓊漿色瓊玖嚙之骨爽神魂清
令我壽同金石久我生疎嬾無所能瘦皮黏骨危峻嶒

病來啖藥猶啖水夢寐恍惚風中燈常聞徂徠有嘉木
玄醴滌濯黃露沐上有兔絲揚翠旌下有茯苓蹲白鹿
咀華嚼葉嚙以津歲久定化腸為筋便從僊佺覲黃帝
身騎肉角青騏驎我欲求之百憂集滿眼蚊蠅隨出入
跋烏箭逝纖阿急日暮空瞻鄧林泣道人此酒還有方
我欲與子同徜徉世上神仙亦何限留侯辟穀應未晚

條風
六首

正月載陽二月條風纈彼郊原載青載紅維麥葦葦維

桑芄芄倉庚戾止有睨其容 二月條風吹彼平林翹
翹雜英如盤如綬維麥離離維桑陰陰倉庚戾止喈喈
其音 三月鳴鳩爰拂其羽玄鳥于翔載庭載宇有縹
者萍亦被于渚睽睽懷人繫念斯聚 維淵有魚悠悠
其逝維隰有葦其葉淠淠睽睽懷人心焉如療瞻言則
懷惓言則睇 維麥離離宜其食矣惟桑陰陰將其楫
矣翺彼鷖鳩如笙如簧澤雉于雝繡衣錦章 殷殷其
雷霏霏其雨睽睽懷人曷其有與霏霏其雨殷殷其雷

于以永言于以寫懷

誠意伯文集卷十五

欽定四庫全書

誠意伯文集卷十六

犁眉公集下

明 劉基 撰

詩

侍宴鍾山應制

清和天氣雨晴時
翠麥黃花夾路歧
萬里玉關馳露布
九霄奎闕絢雲旗
龍文騷褭鸞輅馬
乳蒲萄入羽巵
衰老自慚無補報
叨陪儀鳳侍瑤池

御柳二首

御柳青青蔭綠池
迎春擢秀不違時
皇恩天地同生育
雨露無私爾最知

漫漫春風入舜韶
綠楊舒葉乳鶯調
君王不為娛聲色
無用辛勤學舞腰

秋懷八首

東風吹晨霞
初日垂白足
濕烟屯簷棟
飛雨鳴樸櫟
厭厭厭葉就
黃萋萋草還綠
索居謝喧囂
庭絕車馬躅
念來

多所懷追往不可復嬾隨老共至病與年相促省躬慚
寡尤守分無望福駑駘立卓樞敢慕騏驎逐

秋熱喜稍退秋雨又成霖涓涓屋溜瀉汨汨街泥深清
寒中筋骨濕氣薄衣襟晤言靡與同孤坐難為心俯視
青苔積仰睇玄雲陰弱質昧聞道乃為憂所侵冥冥至
終夕悄悄成孤吟

空堦走穴蟻荒垤啖巢鶴陰氛方騰達密雨已彌漫沉
沉翳光景昧昧感昏旦林鴉濕休飛簷雀饑相喚跬步

隔關河四望空慨歎悽悽衣裳單戚戚歲年宴微生如
不火徒勞暫時煥永寤爛柯入萬事一夢幻

清晨啓扉坐微風動游龍離離牆上花切切砌下蛩
嚶嚶自成音灼灼各有容四序迭推移哀病情所鍾身羸
足已弱有願不得從愧負天地生愴恨填心胷

蟋蟀已在宇鴻鴈方來賓天秋風露寒陰谷何時春欲
為商聲歌恐驚梁上塵衡門掩仲蔚庶用存吾真

飽食無一事一日復一夕倚門望圓穹白雲在空碧來

鴻與去燕歲晚各有適
英英黃金花粲粲好顏色
采擷貴及時霜露已盈積
掩門還獨坐浩然懷往昔
惟有故鄉夢可以慰岑寂

雨息殘暑退涼氣何淒而
羈人倦遙夜明月光在帷
展轉不成寐披衣步前墀
春芳不再穠夕露空華滋
泯默對青燈悵焉心思

薄雲散高風天色青如染
盈庭露輝輝當窻星燄燄
寒來愛蘭缸暑往却筠簟
憂思浩無際起坐數更點
晦明

相代謝避盈乃無歉未嘗涉孟門誰識行路險賈害豈
無因戒之在懷琰冥豫何可長用之以自檢

秋感二首

老病偏多感宵長晝亦長衣冠方謝暑枕席已驚涼往
事鑄心在新知過眼忘籬邊舊栽菊歲晚為誰黃

日白天青木葉凋雲山漫漫故鄉遙石床墜雨珠光動
碧砌幽花玉色銷十載故人俱土壤五更歸夢負漁樵
懷來憶往成惆悵蔓草羈蟲對寂寥

悼廢圃殘菊

舊菊將蕪尚有根，高秋相顧耿無言。
芳心不共青莎死，生態猶欺白露繁。
要待靈均餐落蕊，從教元亮恥空尊。
何人解識淒涼意，分付寒蟬仔細論。

雜詩

趙女工妙舞，秦娥善清聲。同入楚王宮，各擅傾城名。
宵陪綺席宴，夙侍金輿行。常恐他人至，得寵分恩榮。
涕泣奉顏色，冶態隨風生。願為松柏枝，莫作日及英。
開花不

結實坐傷秋露零

白露出草根顆顆如明珠黃華炫金錢亦復盈堦除閒
居無尤物翫之聊可娛衡門不必扃此非衆所須但恐
成蕙以千載令人吁

服力徇穡事矻矻望有秋凌晨荷鋤出日入且未休中
夜看星辰旱潦切所憂西成告豐歲珠璣滿田疇飽食
幸可期喜色欲盈眸寧知霜雪早零落不得收荒畦委
滯穗槿籬掛空篝斜陽照白髮短褐還飯牛天命固如

此汲汲復何求

季世罕上壽百歲為長年
軒皇不可見顏冉復誰憐
安期乘彩虹羨門駕紫烟
朝游蓬萊島夕宿曾城巔
常恐聲風枝摧折滄海田
徒令驪山客想望稱神仙

月明樓鳥動月暗樓鳥定
茅鴟潛枳枸大眼掛宵鏡
皇天生萬物一物畀一性
遂令蓋壤間擾擾事爭競
喧呶窮日夕豈不愚天聽
化工雖云巧為法祇自病
沉思令人嗟欲問誰與應

蒼蒼山上松濯濯庭前柳亭亭彩雲起矯矯含風久佳
人皎如玉曠世難為偶長歌繼以歎去鳥盡回首昔為
瑤草華今為蠹餘杻棄置勿復道華容不如醜

速成非良器驟得難久好桃李望春舒亦復迎秋稿舜
英耀朝日未夕委蔓草飢農種植禾自慶得食早歲莫
寒凜冽衡門淨如掃瀛洲對方壺弱水為池沼不有千
年花安得如瓜棗徐市駕樓船輕帆迅如鳥仙人倘可
見常恐三光老寄書附文鯨碧雲空縹緲

舊在杭時為冷起敬賦泉石歌亂後失之今起
敬為協律郎邀予寫舊作已忘而記其起三句
因更足之

君不見吳山削成三百尺上有流泉發蒼石冷卿以之
調七絃龍出太陰風動天初聞涓涓響林渚悄若玄宵
鬼神語玲然穿崖達幽谷竽籟颼颼振喬木永懷帝子
來瀟湘瑤環瓊珮千鳴璫女夷鼓歌交甫舞月上九疑
啼鳳凰還思媧皇補穹碧排挾銀河通積石咸池瀉浪

入重溟玉井冰澌相戛擊三門既鑿龍池高三十六鱗
騰夜濤豐隆咆哮震威怒鯨魚捷尾驚蒲牢倏然神怪
歸寂寞殷殷餘音在寥廓鮫人淵客起相顧江白山青
烟漠漠伯牙骨朽今幾年叔夜廣陵無續絃絕倫之藝
不常有得心應手非人傳憶昔識子時西州正繁華箏
笛沸晨暮堯離傑侏畢矜誇子獨徜徉泉石裏長日松
陰淨書几取琴為我彈一曲似掬滄浪洗塵耳否往泰
來逢聖明有虞製作超莖英和聲協律子能事固俾變

摯專其名

雪鶴篇贈詹同文

有鶴有鶴丁令威碧玉為骨玄霜衣曾城十二身所依
千年伐毛一度歸洗髓織女黃姑磯瑤臺雪花大十圍
食之神爽肉不肥乘風振羽芳菲菲丹砂結頂煜有輝
咳唾璀璨生珠璣朝遊明星夕大隗騰光躡景超巍巍
滕六驟乘虹蜺駢蓋宮仙娥頊帝妃鎔雲鍊雨成瓊歲
眩晃晝奪扶桑輝離眸閃爍不可睇回森捩捩翼稿旗

嗟哉清峻天下稀勿歎遼東城郭非桂華宵窪甘露澂
味美遠勝商山薇擷英為羞堪咀噉比之琅玕亦庶幾
盤空硬語去脂韋歌以贈君君莫譏

秋夜聽冷協律彈琴分韻得夜字

秋清衆籟寂華月耿遙夜玉琴奏瑤席逸響發高榭微
微風入林稍稍泉出罅闕闕黃鳥春嘈嘈玄蟬夏幽憂
北鄴語赫怒西楚吒初疑廣寒府和鑾起仙駕忽驚龍
騰霄雷電劈太華淒涼漢宮女萬里異國嫁逍遙商山

老芝歌意閒暇斯須變暄涼要妙奪造化終焉返淳樸
瑚璉在縑藉鄭衛失其淫儀秦失其詐虎狼失其擢鳥
鳶失其嚇太音信希聲餘美甘如蔗持此滌塵心永與
箏笛謝

青羅山房歌寄宋景濂

若有人兮乃在大江之南淞河之東連山倚拔瀛海上
上與河鼓天津通憶昔四女下天來遺鬟墮鬕根龐鴻
仙華傑出竅恠異望之如雲浮太空欽崑崙施齧齧不

可上蒼蔚雜樹昏瞳朧虎龍咆號猿鶴叫山鬼呵歛生
悲風嗟哉若人兮胡為乎其中梁檀栂兮桂桂楓結青
蘿兮以帡幪不翦不伐兮不鑿以攻晨嵐暮藹滴晴雨
烟條霧葉相蒙龍繆繆兮纏纏葦葦兮蓬蓬綵糾要紹
兮若蒼龍垂胡降玄穹婪麗披離兮若翠鸞振迅飛翬
氈鸞黃和鳴桑扈應髣髴牙曠之絲桐幽泉發竇鏘玲
瓏六月赤日收蘊隆陽凌陰蓄春始融巖花澗草紛白紅
有時皇初平清夜騎羊朝帝君瓊蕤羽蓋冰玉珮華月

閃爍光成虹松吹笙兮竹舞翾影旆旆兮聲淪淪娛目
悅耳兮樂不可言世間塵土何夢夢山有芝隰有豐石
鑿鑿兮水滢滢倚若人兮美且充飢食倦息兮可以保
我躬逍遙兮棲遲又何必訪廣成于崆峒

為韓克銘題畫石鼎聯句圖

軒轅道士軒轅孫昔隨飛龍陟崑崙乘騎六氣遨乾坤
上窮混沌無涯門下挾若木扶桑根旋雷舞電訛晨昏
批蹴虎豹號帝閭槌擊河鼓牛騰騫摘虹織輝絢澤原

三足老鳥不敢瞰迷離缺兔駭且奔羲和籲號訴至尊
謫降下土營丘樊結喉長頸古貌存如鶴如鵠如龍蛇
詰屈不作人間言涕唾落地生蘭蓀驅叱碣石歸河源
蜚廉屏翳雙挾轡擎捩象齒愁育貢山玄水蒼琮琥瑞
離羅瓘錯輝煇燉笙鏞琴瑟簫與壎五音翕繹珠瀉盆
吹為栗烈呵為暄撲扶罔象笞鼉龜饒鰐辟易徙厥屯
束縛獐魑魍魎魂秉畀赤郭充朝飧妙用歛忽無留痕
嗟哉二子爾曷寃如井谷鮒當化鯢嚶嚶草蟲呼阜蟄

欲與螭蛄語涼溫不知風霆掣手墻藩江騰海躍喬嶽翻
鬼物喘汗相濡歎爽靈漂搖失所踣敞覓夢寐精魄惛
低頭拜伏聳再論陽春二月花滿園掩闕獨坐辭許諠
按圖索意聊滌煩羨君軒轅之後昆浩歌一曲期勿諼
送姚伯淵之清溪河泊所任

清溪之水通秋浦石白水清魚可數鰕鱖鯿鯪魴與鱖
小魚如鍼大如杵侵晨漁艇浮空來千夫撒網雲烟回
鳴榔擊楫聲如雷水怪駭啄珠宮開課魚使者矢魚急

馮夷噓唏龍母泣琴高赤鯉縱有神何暇起騰作人立
吾觀大江之中有壯魚名曰海豨頭如猪羣行九十其
朋徒歆沫成雨倏歛盲風俱旌陽仙人上天去已久平
池波濤隨處有春淵潛鱗陟負冰時哉罔俾虞人後小
魚瑣碎獺所捐大魚多膏祗自煎君不見振振鷺白如
玉沙頭見魚飢不啄一朝飛上瑤華池紫鵝黃鵠相追
隨俯視禿鶴垂六羽還共野鷺爭腐鼠

旅夜

四首

月光天上來入戶清如水游子忽思家披衣中夜起徙
倚步回廊烏啼夜未央欲飛無羽翼零淚濕衣裳

昨夜起觀星月在楊枝上今宵不見月星影空搖漾羽
蟲飛拂戶燈吐孤火壯佇立掩衡門愁來獨惆悵

客愁常突兀今夜燈花生雖知無喜報愁亦暫時平解
襟成獨寢留燈待天明喜固不可求客心恒畏愁

六街馬憧憧鐘響聲暫歇兩星光灼爍中有如眉月既
見月如眉還看月如鏡月光自有恒人心長不定

有柏一章為吳太常作

太常從善七世祖諱安國宣和中以少卿使金被拘七年不屈節

有柏有柏霜露灌之柏葉不萎霜露何其有柏有柏
維葉冥冥歲暮堅冰不渝其貞莽彼北林維榛維棘
玄雲四湧白日晝匿有狼有狐有鵠有烏長翬睢盱
漣腦飯膚有颺其風鰲捷于溟五精相礪江河倒行
蛭矯于雲龍羸于沙哀此下民亦孔之嗟赤堇之金
鑄為干將不刺犀兕孰知其良沙棠之舟泛于廣津
不遇陽侯孰知其神踰彼周行君子蹟之猗彼菴竹

君子植之顯允君子邦家之紀克崇厥覆施于孫子
嚴嚴君子穆穆其猶載其令德貽厥孫謀

黃華一首送葉師仁省兄還括蒼

睨彼黃華有灼其輝驪駒在路送子于歸蔚彼桑桑
猗其條矣心之怡矣維其遼矣翩翩者鳬亦習其羽
悠悠者途孔脩且阻執子之手酌子以酒言念言懷
勞心如糾子有兄弟維曾維臆嗟我之懷曷云能極
瞻彼崇阿維雲茫茫之子之往多我慨傷鴻鴈于征載

號載飛兄弟之遠胡寧不悲山川遐邈日月逾邁送
子于歸俾我心瘳

道士周玄初鶴林行

鶴林道士軒轅徒以飈為輪雷為輿開山養鶴作騏驎
上下二儀周六虛雛成洗髓扶桑窟縞練羽毛鏐鐵骨
聲飄碧落玉清揚影拂太微雲滅沒永夜月明風滿林
竹栢戛擊笙簫音云是旌陽許縣令躡蹻佩劍來相尋
靡薢西枝搖倒景借去林間兩丹頂伐蛟北海莫玄冥

斬蜃南訛封浪井上窮列缺旁九圍却過度朔山中歸
歸來贈我桃樹枝朱衣赤郭手所持令我鞭龍扶虓虎
攝縛臊魃如奴虜授我堯時松子訣轉晴出電噓成雨
鍾山秀色連冶城百花繞屋風泠泠焚香獨坐誦真誥
墜露點滴流華星土伯駿奔從號令鶴鳴聞天空谷應
寥陽寶殿歌步虛河漢當窻回斗柄嗟子哀朽雜病攻
盈顛素髮吹秋蓬空餘硬骨如瘦鶴因子致意浮丘公

為詹同文題浙江月夜觀潮圖

君不見四時平分成歲功以秋繼夏獨不同炎官挾長
握天柄七月赤日熺玄穹蓐收抱鉞蹲白水野氣赫赫
攄赭虹陽侯喘汗河伯暍少昊上訴愁天公會須萬物
長養遂期以仲月虛宵中此夜姮娥魄正滿命駕四蟾
驂兩駮指揮禺强出玄渚蕩滌塵煬清霾蒙河漢發源
牛斗下曲江上與天津通初看一髮起溟徼如曳絙練
來於東漸聞殷鑕鼉鼓發倏忽萬雷聲撼風天吳掉尾
出溟淖馬銜揚鬣招海童霓旌縞帳鷺羽幃瑤臺十二

浮空濛朶珠仙人乘玉輅騰駕鶴鵠飛氄氄長庚欬霍
閃光耀電母扶龍嗥戛銅宓妃起舞素女從瓊珮絳
雲帡幪冰綃霧縠紛颯纒霜旗雪旂高翳空鯨魚呀呬
鰲鰲遁蒲牢哮吼馮夷宮瞿唐巫峽起平地灩澦若象
鑒回漉先驅已過赤亭嶂後從始發龕山嶺商聲爽浙
合羣籟澤國凜凜寒欲凍先生翫月坐樓上夜氣澄寂
神和冲憑闌快覩煩暑退呼兒命酒澆喉嚨自舞自歌
歌自作月照白髮三千總歌聲迤颺林壑應竹樹戛擊

絲與桐淵魚躍波棲鳥作紫桂繞屋清香融君歌曲終
響未終我歌激烈留征鴻瞻眸相視俱老矣況有衆病
來交攻聖明天子御宇宙威惠與天相比隆首丘倘許
謝韞絆猶有古月光臃腫行當唱和三百首永與潮汐
流無窮

送張孟兼之山西按察司僉事任

平明集冠蓋祖帳清江濱天縣赫曦日山湧崔嵬雲大
舶發中流碧水龍鱗紋宿雨霽初伏川原無垢氛脩楊

翁深綠禾黍氣如饋蘆荻響微風鸛鶴鳴相聞市酒雖
云薄情至心自醺贈詩雖不多芳意同蘭薰丈夫樹遠
業兒女徒紛紛農夫務去草稊稗職所耘蒼鷹司鷙擊
梟鸞慎其分利劍斷犀兕不數雀與鼯籌邊有廟算樽
俎茂奇勲巍巍太行山蒼翠浮網緼萬古戒華戎峻極
通天文老羅當道卧氣讐狼虎羣引領望征旆迢迢隔
河汾營平曜前烈定遠揚後芬制勝在兩楹豈必疲三
軍功成早歸來華袞昭玄纁

病眼作

君不見昔日方相氏黃金為四目精光倏昱奪長庚導
者超風觀者肅一朝竣事歸有司委棄塵埃同朽木我
生兩眼粗能視要探天根窺地軸論價未止連城璧傳
聲共推天下獨寧知用譽責含章鬼物由來闕高屋三
彭上詈三盧聞乘時作覺何其速吳回熾炭煎赤汗灌
注清揚發炎煥赫如巨鱗出淵淪絢若錦衣蒙綺縠淚
漬紅桃喑露開眇昏丹雀披烟宿鷓鴣呼雨荔支垂布

穀啼山蓬蘽熟雪深太白眯碧鷄霧苦瑤臺落黃鵠自
分衰年已無幾齊力卒單筋脈縮春榮秋悴兩茫茫柳
綠花紅非所逐天公若復可憐生乞與寸光分粟菽無
勞指點某在斯不用南陽潭土菊

秋日即事

十五首

秋風吹雨冷脩脩堦下金錢爛漫愁鴻鴈不來巢燕去
草蟲辛苦獨知秋

楊柳新栽半出籬夜深烏鵲自驚枝露涼月淡空烟暝

啼到金鷄報曉時

九月東風露不寒
蟋蟀相慶語簷端
野人便擬開荒徑
剩種忘憂與合歡

搖落江皋草滿煙
秋光何處不堪憐
夜涼銀漢低城闕
卧聽蛩聲似筦絃

春華秋草兩悠悠
素髮多情却滿頭
落葉自隨流水去
遠山空帶夕陽愁

垂垂密雨暎楊花
點點青苔繒短牆
不是鴈聲天畔過

爭知今日是重陽

秋氣蕭條宋玉悲西風唯有鴈相宜
秦淮岸上青青草
想見繁霜未落時

寒星無數月如鉤
槁葉呼風入敝裘
人世可憐唯有老
鏡中憔悴夢中愁

掛壁青釭照不眠
相看到此亦堪憐
露寒霜重殘螢盡
腸斷秋風憶往年

病眼昏昏四顧迷
獨行渾似雪中鷄
花開葉落真成夢

愁聽門前過馬蹄

槿華數樹夕陽時收拾秋光在短籬
自紫自紅還自碧
祇應獨有暮蟬知

滿天星月一庭煙坐掩衡門思悄然
漫想明珠成薏苡
却嫌黃菊似金錢

疎雨鳴簷月在雲馬蹄初歇夜將分
鴈行却向城頭過
何處砧聲隱隱聞

江上秋高暑未歸照書猶有數螢飛
東風可是憐游子

不遣看天憶授衣

北風吹鴈過蕭蕭旅館青燈共寂寥蓬鬢一時成白雪
老來禁得幾秋宵

戲為雪鷄篇寄詹同文

我為先生歌雪鶴逸興翩翩入寥廓先生為我詠雪鷄
扶桑晝景寒淒淒迷雪鶴排雲舒六翮長鳴遠逐浮丘伯
玄洲巨君張兩耳聳人踉蹌走如蟻雪鷄欲上蟠桃枝
白光爍眼流瓊藕騰身蹋折琅玕樹片片琪華振鷗鷺

鶴飛撥刺向遼東海鯨揚波雪半空縞衣襪褫丹項素
九臯月黑猿啼風鷄啼喔咿夜方永驚起跋烏怨金井
羣仙環珮響玲瓏十二玉樓烟霧冷憶昔康回觸折天
柱時女媧扶天立天維坤維太白作天骨萬古至今長
積雪上有雪蛆大轂長如轅水蛇雪鼠相蜷蛻味如餒
餽色如乳入口清涼生肺腑炎埃蕩滌邪穢除幽精爽
雪游六虛鶴也莫與烏鴉爭腐鼠鷄也莫向溝塍拾禾
黍雪寒可畏清可欲洗髓伐毛天所玉雪可嚙兮冰可

餐誰其作友三青鸞

茗溪皇甫秀才幽居 二首

玄宴先生一草廬萬竿脩竹五車書日高無客來驚夢
自謂公侯總不如

天目山前茗水流野華啼鳥自春秋滄浪清濁吾何預
坐聽松風咲許由

贈杜安道

憶昔天兵伐荆楚舳艫蔽江齊萬櫓謹聲激烈似雷霆

猛氣魚焦震貔虎拔柵皖城猶俯拾探穴九江無險阻
明年大戰康郎下日月坤圯相吞吐馮夷蹋浪羣水飛
巨鰲掉首三山舞雲隨太乙擁鋒旗鼉為豐隆作靈鼓
將軍金甲箭攢蝟戰士鐵衣汗流雨火龍嬉蹴降天衢
燧象逐煙煎地府鯨鯢既翦橈槍落草木熙陽魚出谷
當時從臣皆俊良近侍共推徐與杜或操陳子之刀鋸
或負伊公之鼎俎艱難出入矢石下鞠躬盡力無摧阻
夙興夜寐事一人小心不貳帝臨女只今四海同車軌

封非罔遺遵往古瓊琚赤芾邁鵷行鞍馬祿食光門戶
天鷄一聲金闕啓龍顏有喜常先覩顧我愚疎憂患集
病骨峻嶒蒸溽暑興來懷舊倚長歌星星兩鬢絲千縷

連江陳子晟師古齋詩

三首

祥麟踣魯數王道遂湮淪秦坑扇灰炰六籍失其真茫
茫穹壤間談舌紛輪囷鴟鵂指為鸞杞梓斯為薪所以
尚志士慷慨思古人造行擬淵騫吐辭追孟荀不羨季
氏富而甘原憲貧不榮桃李容而效西施顰臨川翫清

瀾味道劇淳珍誰云泰岱高布武期必臻誰謂江漢永
利涉由通津有為亦若是此語非徒申

衛武陳抑戒睿聖垂芳名呂公著丹書君臣同顯榮伯
玉願寡過使者知其情柳惠志直道身置德乃盈古人
如良金百煉彌剛貞悠悠萬載下日月同昭明聖人有
遺訓可畏在後生服膺慎勿替竊比於老彭

西風振枯柯涼月澹光景門前馬蹄歇室虛心獨靜焚
香對六籍耆味知雋永懷人若在眼酌潦何必洞尼父

訓九思子輿明三省康莊無他岐車馬日馳騁捷徑善
摧輪此意當默領

贈欽天監夏官章季明

季明衡州龍游人所居地名東觀

靈峯勝跡不可求東觀後人知九疇神仙上天風自送
樵子下山龍出游渾天玉局木客護太乙寶書金匱收
巫咸杳冥何處問早晚泛槎窺斗牛

題水墨海棠鸚鵡

隴山鸚鵡白霓衣欲語誰聽只自知漫漫東風吹不起

海棠花上立多時

寄贈懷渭上人

老僧懷渭字清遠，曾蟠文史三千卷。
雪晴太白玉為峯，月出藍田金作壑。
少年挾策走四方，要看蓬萊水清淺。
燕山帝京龍象會，璿臺寶林發闕鍵。
橫空鵬鶚撇高秋，縱轡驂騑逸長畎。
龐眉老宿皆震驚，觀者解頤陪者赧。
奎章學士虞邵菴，喈喈稱誇枯舌本。
連床笑語到晨鷄，走筆贈言何欸悃。
轉頭霜雪四十年，萬事茫茫不堪忖。

江湖歟浪客舟寒地爐宿火僧房煖我來邂逅一見之
憶曾相識嗟成謾世上如公良所希方外只今還有限
我如野馬貫藪澤絡以羈韉知必踈老來耗耄百事違
况俾三廬宅愁眼甚欲歸依白蓮宇其奈素餐非力墾
寄言聊復寫中懷白石清泉猶未晚

為張生題趙仲穆畫馬

天廐之馬高且肥王孫貌出真權奇杜陵寒儒恒苦飢
枉使韓幹遭誚嗤渥洼天馬龍象力朝發太蒙暮西極

豆芻五石充一食力由食生非外得地黃苜蓿美如飴
燕以甘泉清肺脾神完氣定叱止時素餐立仗馬恥之
高風吹鴈酸棗紅狼烟夜半通回中為君長鳴起子公
斬取郅支歸獻明光宮

題李息齋墨竹

李侯貌出蒼筤竹葉上湘妃淚未乾烟雨晝迷丹鷺驚
霜風秋勁碧琅玕脩莖擬截伶倫管和氣潛驅嶰谷寒
此意祇令誰賞識高堂素壁靜時看

送陳子晟省親歸連江

連江此去三千里
綵服趨庭及早春
閩嶺白雲迎馬首
建溪碧水渙龍鱗
題橋兔穎留南徼
戀闕丹心照北辰
鶴髮正須三釜養
鳳城雨露四時新

送黃生莅祀福建

九重發政懷川嶽
使者承宣下紫宸
玉璫黃流敷帝澤
碧鷄金馬出坤珍
風清五嶺烟霞肅
春到三山雨露勻
歸路武夷溪九曲
棠梨花映綠楊津

春夜一首

春夜迢迢微風不興六合無氛銀河欲冰月流素波星
回玉繩孤坐不寐憂思相仍壯年已謝昔非莫懲如彼
老馬心念超騰道路崎嶇勸不可能俯撥紅爐仰剔青
燈欲與晤語誰其我應

青陽一首

青陽俶載白日孔昭草生于野華發于條隨氣成形或
藻或翹睠睠興懷中心飄搖麥有雉雒藻有魚跳嚶鳴

在樹磬管簫韶駕言出游以猶以陶暗不可髻擇不可
天自非松栢不能後彫來者弗畏往者其消

乙卯歲首早朝奉天殿東翰林大本堂諸友

枝上鳴嚶報早春御溝波澹碧龍鱗旗常影動千官肅
環珮聲來萬國賓若乳露從霄漢落非烟雲抱翠華新
從臣才俊俱揚馬白首無能媿老身

元夜

玉漏遲遲出苑牆星河疎淡月輝煌送寒梅葉清香細

報喜燈花紫燄光金闕曉霞來若木瑤池春色滿長楊
君王注意防驕佚萬歲千秋樂未央

送李叔允脩撰致仕歸釣州

憶昔西京祖二疏都門供帳羅長衢金張許史集軒蓋
彈琴鼓瑟吹笙竽潁潁鶴髮映霄漢蒼松翠栢紅珊瑚
道傍觀者皆慨歎此士足為天下模先生胷蟠五車書
雍容進退安且徐披香朝侍紫宸案珥筆畫入承明廬
引經論奏動天聽天語親授非臚句老年謝事歸里閭

召見特許兒童扶臨軒賜膳侑金幣尚食供奉黃門
趨夜來微雨清郊墟緗黃漚柳鶯相呼風吹暖烟逗
白日露濕芳草留驪駒雖無旨酒嘉穀蔬短歌一曲
聊踟蹰浮雲流水無根蒂人生何者為驪虞嵩高少
室衆美與素石如玉泉如酥時清四野樂耕稼雉鳴
麥秀千華敷親朋會合各慰意况有令子知勞勩揮
金買酒泳聖澤怡情之外吾何須西飛鴻鴈東飛魚
相思迢迢天一隅贈言有盡意不盡努力善保千金

軀

春日一首送吳浩叔大之饒州府通判任

春日載陽鳥鳴于桑與子為別思心洋洋人生幾何
憂念苦多仰睇浮雲俯觀逝波有散在籩有酒在觴
無日不腆物鮮意長翱翔者鶴飛鳴戾天企賢則善
企聖斯賢古人有言立事惟勤克敬勿懈何適不臻
古人有言顧畏民畧綏溜摧山患生不監駕彼四牡
言陟太行羊腸不償儆在康莊感以情生憂由愛甚

有酒在尊云胡不飲春日熙熙芳草菲菲與子為別
胡寧不悲歡言悅耳是謂疾疢君子虞之如矢如刃
忠言諤諤是謂藥石君子好之如金如璧相彼川水
孔淵其澄風以撓之黃濁山騰有蘭有蘭在彼幽畎
無日不顯其芳維遠春日遲遲鳥鳴啾啾與子為別
胡寧不懷

送陳庭學之成都衛照磨任

君不見岷山導江戒南紀噴雨噓雲九千里瞿唐劍閣

鍵重關錦城花繞成都市雄藩作屏鎮羌夷列郡五十
爪牙之長夏雪山連太白玄冬熱海蒸坤維聖皇握符
御宸極烟塵不起鯨波息鳳凰麒麟在郊數川后獄靈
俱效職籌邊樓上羅俊良況子敏學年方將將軍幕府
曾試用驊騮熟路宜騰驤大舩揚帆汴江水東風漫漫
吹蘭芷綵衣鶴髮對晨昏有酒盈尊甘且旨吾聞岨峽
上與井絡通風氣隔閩華與戎九夷八蠻濡帝澤廟堂
已得攻心策

題李太白觀瀑圖

憶昔李謫仙泛舟彭湖東遂登廬山頂直上香爐峯遙
望瀑布水自天垂白虹大聲回九地浮光散虛空萬木
震辟易千崖殷鐘鏞清涼入肌骨如歸廣寒宮賦詩留
人間至今響淪淪丹青極摹寫欲弋玄造功逸駕不可
追舉頭睇飛鴻倚歌無人和引袖乘長風

劉宗文菜窩遣興

歲暮寒氣冽今晨頗和緩登高眺原陸陡覺生意滿日

色照地黃牆影看漸短草抽識土膏魚出知泉暖吾生
亦天物安得不樂行且復擷其蔬獨酌慰衰晚

新春

昨夜東風來吹我庭前柳柳芽黃未全草根青已有鶉
鳩屋上鳴勸我嘗春酒我髮日已白我顏日已醜開樽
聊怡情誰能計身後

送季德大之文登稅務官任

有客有客駕言遠行天路脩廣鴻鴈冥冥淒風吹衣白

日滿庭有酒在樽可以怡情云胡不飲使我心慄歌以
侑之百祿具并

芄芄者麥在彼原隰悠悠行人既舟既楫海邦孔遐雲
霧厭浥勿謂政難克敬則立勿謂俗殊克誠則輯贈言
不多聖企斯及

送醫戴原禮歸金華

峇峇金華山上屬匏瓜星紆餘帶江海窈窕儲仙靈陰
谷泉夏冽陽崖草冬榮帝女降清夜龍鸞夾雲輶旭昱

五色先天葩播芳馨初平剽元氣騎羊遊玉京宗公秉
節鉞稜威懾邊庭呂子傳聖學出辭樊六經陳生挾英
才雄辯摧五兵至今文彥士綿綿若連城子兮抱奇術為
人駐危齡運鉞號二豎煮齊泣三彭歲晚趣歸裝日照
千山明澗阿多石芝玉色味如飴可以實肌腸化骨為
瑤瓊或可分餉否相從翺紫清

松陽周處士冰壺歌

并序

冰壺者括蒼周處士之所以自號也夫冰太陰寒水之

凝而壺者器也水凝為冰至柔而變為剛天下之剛莫
尚焉壺之貴者以玉為之雖栗而冰孚其腹僕切畏之
於是乎歌以評焉歌曰

陰風吹空寒凜冽玉壺夜半玄冰結十二樓中鎖翠鸞
太微宮裏縣明月明月流光照玉壺珠飛上天滄海枯
青女鍊霜封貝闕燧人燭犀龍泣血銀河凌澌膠北斗
五色石裂媧皇走相看一笑天茫然回首人間三萬年

鷄鳴一首贈宗文姪

鷄鳴朝暉草露未晞巢鳥其歸鷄鳴夕陰草露淋淫鳥
歸于林鷄鳴匪司時鳥舉匪有期氓之蚩蚩蓋亦何思
朝露白如玉我不敢躅恐濕我足夕露光如珠我不敢
踰恐濕我裾誰謂河弗廣可航可蕩風波無期不如勿
往誰謂林弗幽可逖可游豺虎無虞不如勿由中田有
禾園有樹麻發石有泉可以為家中田有麥園有樹核
采山有蔬可以為宅

送金華何生還鄉觀省

金華山色翠亭亭曾駐仙人白玉軒羨汝結廬松栢裏
卧看鸞鶴下青冥

尚想高人向北山談經論道此山間故家文物依然在
似汝須歸玉筍班

漫漫東風吹綠繁行人江上發歸軒想應今夜春山月
華髮蕭蕭正倚門

樓外桃花紅錦披當花把酒映花枝慈親飲酒看兒咲
記摘桃花洗面時

送兒出去望兒歸看盡雛鴉弄夕暉清曉開門兒却到
蟪蛄飛上老萊衣

正月十五夜燈花大開作歌

燈花如營紅且綠燈花有意憐幽獨夜寒衾冷漏聲遲
卧看瓊枝綻金粟涼蟾入戶四壁空地爐宿火天無風
祥煙抱日麗碧落驪龍吐珠歆紫虹人言此花專報喜
勞生短髮絲垂耳无望之福非所希無事惱懷吾足矣
呼童添油引良夜九衢燈月光相射漫沽濁酒餉離魂

豈必忘憂惟樹萱

送胡生之定遠教諭任

為陶中立參政作

青陽獻嘉歲萬物生華姿柔桑萸綠英新柳揚黃蕤祖
帳送行人大舶艤江湄管絃發清音甘醴溢瓊卮歡情
既已暢繾綣申以詩丈夫生世間出身事明時有材
必有用譬彼桐與椅絙之朱絲絃彈以格神祇一奏獸
率舞再奏鳳來儀校官職敷教位小任匪卑棟梁自句
芒神霄起陂池仕學猶兩翅對舉不可遺努力慎保愛

勲名以為期

送駱起原之新城知縣任

憶在越王城與子共翱翔子實才俊士舉止安且詳溫
如春雪消日照瓌琳琅一別二十年塵沙翳玄黃淒風
拉梧桐霜露摧簣簣浮雲變白黑各在天一方邂逅忽
相逢悲喜交肺腸故情豈不懷王事不敢遑倏歛復
為別安得不慨慷西江富文彥其俗淳以良念我別來
久愴恨增感傷英英江梅花皎皎晞晴暘折以贈子行

侑之以短章萱草亦已生鶴髮在高堂征鴻漸于遠擢
翻陵八荒行將儀大廷鵷鳳參頡頏陟遐必自邇永矢
莫相忘

維澤有蒲一首

并序

維澤有蒲為陳生思禮作也陳生生七歲而父沒母石
氏教育之甫成人而母又沒生哀痛不能勝輒發狂欲
自盡者四五家人守救之獲免翰林學士金華宋先生
為叙其事予聞而深悼焉因賦詩代言其情雖不足以

附蓼莪之後亦聊以見天理之在人心昭昭乎不泯也
嗚呼悲夫

維澤有蒲其葉濡濡誰無父母惻我獨孤昊天不矜鮮
民卒痛我罪實訐父母何辜人有父母如日如月照
之照之弗隕弗越人有父母如玄如黃覆之載之不遐
有傷陟彼崇丘言采其葛望父不見憂心如割陟彼
重阜于以望母不見母兮憂心如灸相彼虎雉亦各
有從矧伊人矣懼此鞠凶啼彼中林爰有哺烏惻我人

斯云何其瘠父兮見兒孩咲咿咿晨興未炊早念其
飢母兮見兒孩咲歡歡草蟲宵鳴早念其寒既髻既
髧綵衣有茨父攜母將如琬如琰出則睹之入則撫之
行有陞杙式趨負之中園有橘離離其實人無父母
曷其有卒中園有梨其實離離人無父母生也何為
川水東流蒼天悠悠恫我鮮民不知其尤空山冥冥離
禽夜鳴恫我鮮民曷為其生

遣興

春至日色好白水生青烟江梅已堪折園柳亦可憐鳥
鳴山芳菲魚躍波漪漣人生覆載間與物共推遷守分
絕外求何者為憂煎但願有酒飲無事驚晝眠即此是
至樂安用松喬年

春雨三絕句

春雨和風細細來園林取次發枯荑古牆芳草無生處
一滴還成一點苔

翠麥黃花爛漫春蒼顏皓首別離人相看一咲渾成夢

又見汀洲白老蘋

一雨如膏五日泥長烟不散草萋萋殷勤分付牆邊柳
為挽流鶯自在啼

潛溪圖歌為宋景濂賦

金華山水天下希潛溪龍門尤絕奇羣峯峻極河漢上
一峯獨立芙蓉陂先生結廬在其下文追班揚兼賈馬
遂令此山增壯觀野有樸檟皆梧檟上清道士方方壺
乘興為作潛溪圖丹崖翠麓神仙居東望日出樹如蘇

溪流穿林還度谷十里一達五里伏龍湫吐景生白虹
藤蘿振雨松呼風却憶往時清夜月帝女乘雲下天室
鐘鏞鏗鐃簫鼓發霓裳羽衣飄滅沒初平騎羊前啟行
長髯鬚髮飛玉霜秦娥吹笙玄鶴舞牽牛河鼓凝寒芒
相思迢迢頻入夢夢駕兩鸞從一鳳覺來毛髮猶爽淅
目送征鴻度空碧山有疏水有魚幽澗有泉清可斟何
時上疏乞骸骨寄聲先遣雙飛鳧

將曉

月落牕餘白練光滿天清露結為霜東風可是無情思
吹出新楊一樹黃

有泉在山一首

有泉在山爰注為壑膏火自煎一室之燭蔚彼茂林有
檀有松有梓有桐可以為車可以為宮有泉在山爰
注為淵膏火之燭維以自煎蔚彼茂林有柞有槲有櫟
有櫟可以為薪可以為杙

東園之柳一首

東園之柳萋其黃矣瞻彼白日煥其陽矣
瞻懷思曷其長矣東園之柳萋其青矣
瞻彼白日煥其明矣瞻懷思曷其平矣
東園之柳冉冉其華悠悠行人玄髮
卒華瞻彼白日維懷永嗟黃鶯于飛
啾啾其音惇惇行人悠悠其心瞻彼
白日維懷永吟

雙鯉堂詩為唐侍儀賦

君不見魯陽揮戈回白日又不見耿恭拜井飛泉出
精誠自古格皇天如響應聲非異術長江鯉魚龍伯臣三

十六鱗紅錦勾枕丁尾丙宮淵淪乘駕潮汐扶桑津天
憐孝子孝不匱特勅水官宣德意玄水躍出雙赤鯉
頂刻寒谷生春溫之子高堂髮如絮每懷古人心是慕
中庭鑿池專種魚魚行圍圍隨陶朱晨昏膳羞不遠索
翠韭金橙鱸肥白中婦奉飧少婦進大兒登歌小兒拍
合歡花開庭草芳忘憂花開池水光凌晨上馬出門去
彩袖披拂金爐香薄暮言歸拜堂祀何況有魚甘且旨
忠孝由來同一軌努力揚名煥青史

春日雜興八首

采石磯頭春水平，長干橋下暮潮生。
誰能載酒尋芳草，楊柳隄邊信馬行。

過雨柔柔綵綬新，涵風細麥碧波勻。
鳴鳩語燕聲相應，又是人間一度春。

春霧冥冥木葉稠，蒼鴈拂羽化為鳩。
莫將松桂夸桃李，柱下先生早白頭。

日自西馳水自東，落花飛絮總隨風。
舊巢燕子今何處？

烟雨庭臺似夢中

花競嬌嬈草競芳從橫只是為春忙
夭桃穠李先飄落不及薔薇與海棠

細雨冥冥晝掩扉更無芳草有垣衣
人生一世邯鄲夢老病無眠夢亦稀

雨隱滄江霧隱山鄉關迢遞寄書難
病來只盼春風到不擬春風曉更寒

日出江空曉氣柔白蘋風起渚烟收
夜來一餉三更雨

送盡飛花入海流

送黃巖林生伯雲還鄉覲省

生兒須男不須女二十辭家事明主由來卿相出白屋
志士寧甘守環堵天上黌宮古庠序濟濟衣冠鵷鷺羽
學業須兼文與武濟川期舟旱期雨懸髻看書困不眠
劬心問道飢忘咀朝來忽覩林間鴉雛飛哺母聲啞啞
慨想高堂缺溫清稽首天閭動天聽春烟蒼茫春樹綠
水煖芹芽白如玉扁舟蕩漾駛歸風綵服飄揚炫晴旭

盈門弱柳驚黃絲鶯鳴如絃花滿枝開門見兒喜不定
問言執手仍牽衣牽衣上堂拜嘉慶籩豆既具殽且時
兒前勸酒還蹈舞親戚滿筵譔咲語朱顏婉婉映青松
鶴髮嬋娟照芳醕為子歌一曲送子江之湄到家早來
旋勿為兒女慈人生有親樂莫樂況乃君恩重山岳讀
書不可迂檢身不可疎勸子慎勿學世儒顧言恥行名
為愚君不見良金鑄為器鼎鼎亨飪干將利才全德備
稱大賢報國榮親兩無愧

感春

種桃望食實種柳期成陰春風應時至雜英滿園林黃
鳥多嘉聲鴈鳩亦好音勿言荏苒質不如松與楫托根
信永固豈乏歲寒心

孤坐不自適興言出行游凱風吹衣袂白日光悠悠來
牟秀彌野荷芰葉已抽行游豈不好顧盼無與儔回身
掩門坐隱几聞鳴鳩

日暮東風起滄江水微波水深不可涉路遠將奈何靡

蕪葉已齊故鄉隔山河盛年難再得芳意其蹉跎

朝采山上蕨暮采澗底薇雖無梁肉味聊可以御飢
羊薦美酒飽食同黍犧玄廬苟未閑彼此誰是非

春風既和柔春日更皎潔天桃紅如錦繁李白勝雪黃
蜂與紫蝶亦各競時節人生有憂樂譬彼天上月願言
良其背無使心自熱

人生多憂患死去百患消但恨不得無由脫韃鑣浮
榮衆所貴何異掠草蟲一生與一死一夕復一朝周罷

忌盈滿老子戒矜驕園林無恒芳江海有回潮委心從
大化庶幾永逍遙

枯樹圖歌

道傍古樹身半枯白蟻穴根蟲穴膚風摧雨撼霜雪凍
斷石艱脆無人扶憶昔勾芒肇初政百卉騰達隨呵噓
新柯荏苒舊柯壯霧露膏沐光如濡黃鸝翡翠語嬌滑
棄扈戴勝鳴相呼白鶴來巢鹿止蔭匠石愕晚爭歎譽
寧知憂患生旦夕野火倏忽起不虞燎原烈焰難嚮邇

孰問柞櫟杉與櫟枝燔葉炊根半赤朽腐瞞液非時須
山林搖落歲方宴聊以薜荔為衣袂嗚呼廣廈棟梁具
委棄草莽同新藟皇天未必替生意更盼玉燭回暘
烏

遣興


萋萋芳草掩重門幾樹斜陽照斷魂坐愛微風起蘋末
月明簷鐸語黃昏

即事

春半餘寒似暮秋
掩門高坐日悠悠
樹頭獨立知風鵲
屋角雙鳴喚雨鳩
芳意自隨流水逝
華年不為老人留
浮花冶葉休相咲
自古英賢總一漚

遣興

江上潮來風捲沙
城頭畢逋烏尾訖
燕泥半濕昨夜雨
蛛網忽黏何處花
孤坐日月自閒暇
出門歧路空交加
漫將白髮對芳草
目送去鴻天一涯



誠意伯文集卷十六